

20 JUN 2001

Abdullah-Wanita

UMNO IKTIRAF PERANAN WANITA DALAM PILIHAN RAYA

KUALA LUMPUR, 20 Jun (Bernama) -- Timbalan Presiden Umno Datuk Seri Abdullah Ahmad Badawi hari ini menyatakan penghargaan terhadap peranan Pergerakan Wanita Umno dalam mendapatkan sokongan terhadap parti untuk memastikan kemenangan calon-calon Barisan Nasional (BN) dalam pilihan raya.

Katanya Wanita Umno berjaya berbuat demikian melalui pendekatan peribadi dan kekeluargaan yang menjadi penyumbang besar kepada kejayaan calon BN.

"Wanita Umno telah meletakkan satu piawai yang tinggi dalam memberikan sumbangan berkesan diarena politik negara. Ini terbukti apabila pembangkang turut mengambil langkah meningkatkan emansipasi wanita dalam pergerakan politik mereka," katanya.

Abdullah yang juga Timbalan Perdana Menteri berkata demikian ketika merasmikan secara serentak perhimpunan agung Pergerakan Pemuda dan Wanita Umno di Pusat Dagangan Dunia Putra (PWTC) di sini.

Beliau berkata tenaga Wanita Umno adalah sumber yang telah memberikan kekuatan kepada Umno dengan para anggotanya menunjukkan contoh baik dan terpuji daripada segi kesetiaan dan pengorbanan dalam perjuangan.

Katanya walaupun daripada segi nisbah, tempat-tempat yang diberikan kepada wanita sebagai calon dalam pilihan raya atau jawatan dalam kerajaan adalah jauh lebih rendah daripada bilangan keanggotaan mereka dalam Umno, namun komitmen Wanita Umno terhadap parti tidak terjejas.

"Setiap kali parti menghadapi cabaran, anggota Wanita dengan tekun dan sabar melaksanakan tugas dan tanggungjawab dengan penuh amanah," katanya.

Abdullah berkata dengan tertubuhnya Puteri Umno, golongan wanita akan memainkan peranan lebih besar dan berkesan kepada parti untuk menghadapi cabaran semasa dan di masa depan.

Perhimpunan agung tahunan Pemuda dan Wanita Umno hari ini diadakan sehari sebelum perhimpunan agung Umno selama tiga hari yang akan dirasmikan presiden parti Datuk Seri Dr Mahathir Mohamad, esok.

-- BERNAMA

MAM AZZ LAT